

Galv d'en em sevel a-enep ar G7 hag e ved

Petra ar bed eo ar G7 ?

Bodet eo ennañ ar 7 bro galloudus o armerzh eus ar c'hornôg (ar Stadoù-Unanet, Alamagn, Bro-C'hall, ar Rouantelezh-Unanet, Italia, Kanada). Sevel a ra ur hierarkiezh etre ar broioù ouzh o disheñvelaat etre ar re c'halloudus, steudet mat ez-ideologel, hag o tisteurel ar re n'ez int ket. Adalek m'eo bet savet ez eus bet tamallet d'ar G7 ne oa ket reizhwiriek. O harpañ ar frankeskemmerezh, an direolennerezh, strizhentez ar budjedoù, o deus kenoberiet broioù ar G7 da lakaat kreskiñ ingal an digevatalderioù sokial ken o deus diraezet ul live hep e bar abaoe tost da gant vloaz.

Gant uhelvodadegoù ar G7 ez arouezier mestroni galloudoù pennañ ar c'hornôg, e severer an treuzvarc'hadoù spletusañ evit ar gevalaouriezh. En treuzvarc'hadoù-se eo e tivizer ar politikerezhioù armerzhel hag arc'hantel ma vo gourlakaet pobloù ar bed dindano.

Un dra ispisial a vo gant an uhelvodadeg a zeu : dalc'het e vo e Bro-Euskal m'eo gwriennet ha bev-mat enni an harzerezh ouzh ar c'horvoerezh kevalaour, ouzh ar gwaskerezh impalaerelour ha hetero tadveliel hag ivez ar c'hengred hag ar youl da sevel ur bed disheñvel.

Bed ar G7

Stankañ gwellañ ma c'helle enkadennoù lerc'h-ouzh-lerc'h ar gevalaouriezh o c'hourlakaat d'ar bed ar c'harkan nevezfrankizour eo bet e-pad pell pal uhelvodadegoù ar G7. Hiziv emañ an dalc'h evit ar berzhidi gant saveteiñ ar reizhiad diouzh heuliadoù ar politikerezhioù divizet ganto abaoe ouzhpenn 40 vloaz. Evit an dra-se ne dapont ket bezañ ken efedus ha ma lavaront, en abeg d'an distabiled etrebroadel, d'an enkadennoù niverus kemmesket, da c'halloud al lazioù kevalaour ha d'an divizoù kemeret na bledont morse gant gwrienn an droug. E gwirionez n'eus eus an uhelvodadegoù ker-ruz-se (500 milion a zollaroù e 2018) nemet taolioù kehenterezh.

Marvus da vat eo stad ar bed aroueziet gant ar G7. Anat ha dizinac'h an arvezioù anezhañ :

- direizhiadur an hin
- kontammadur an endro ha digreskerezh ar vevliesseurtiezh,
- kresk an digevatalderioù etre ar broioù hag ar renkadoù sokial e pep hini anezho,
- brezelioù impalaerelour, emgannoù broudet ha paourentez evit miliadoù a dud,
- divroadegoù dre heg ha klozadur ar broioù pinvidik,
- kresk an aotrouniusted, an integrouriezh relijiel hag ar mennozhioù gouennelour,
- kresk ar feuslter a reizh bouetaet gant ar politikerezhioù nevezfrankizour,
- diberc'hennadur ar geodedourien hag ar c'heodedourezed, ar pobloù hag an tiriadoù gant embregerezhioù treuzvroadel hollc'halloudek.

En un darn vat eus an denezh e tiouerer ar gwirioù diazez embannet gant disklêriadur hollvedel gwirioù mab-den. Pobloù a vez bepred dinac'het pe gwasket taer, nac'het outo o gwir d'en em dermeniñ o-unan, betek en Europa ivez. E broioù ar G7 o-unan e kas ar politikerezhioù strizhentez da washaat an aozioù buhez hag an aozioù labour.

En ur saviad a enkadenn sistemek liesventek emaoamp : kevredigezh, politikerezh, endro, geopolitikerezh... kement-se a laka e kont an aozioù bevañ war an douar.

Gant peseurt temmoù e vo pledet e 2019 ?

Bep bloaz hag eñ tamallet da vezañ direizhwiriek e laka ar G7 war wel temmoù eus an amzer-vremañ hag e ped tud eus ar gevredigezh sivil da zont da gendivizout. Evit gwir n'en deus biskoazh ar G7 dalc'het d'e ouestloù. E zisklêriadurioù klozañ a zo anezho ur roll mennadoù mat na zeu biken d'o heul greadoù fetis na redius : skoazell d'an diorren (e Bro-Skos e 2005) paradozioù an arc'hant bras (en Iwerzhon e 2013), pe gwirioù ar repuidi (en Italia e 2017), skouerioù a zo n'eus forzh pegement.

Bodadegoù ar G7 evit an tiriadoù e kont

En tiriadoù a zegemer uhelvodadeg ar G7 e vez krennet war ar frankizioù publik da vont ha da zont pe da vanifestiñ. Gourstaliet e vez ur stad a seziz hag un dalc'hidigezh polis mougus (anv a zo e teuo 15 000 a soudarded hag a bolised).

Perak e tlefemp asantiñ d'an dra-se hep sevel en e enep ?

Ne gred den ken er G7, den ebet n'en deus c'hoant eus ar G7 ken. N'eo ken nemet foranerezh arc'hant publik hag ar gwellañ tra eo divodañ anezhañ krenn ha krak.

Adal Bro-Euskal ivez sevel ur bed disheñvel

En em sevel a raimp da vare G7 miz Eost 2019 e Bro-Euskal peogwir e rank ar bed enkorfet gantañ kemmañ don ha diwar-vremañ. Posupl eo sevel ur bed disheñvel ha mall eo en ober ; ha rankout a reomp kemer perzh evit en ober adalek Bro Euskal. Amañ ivez ez eo bet liesaet ar stourmadegoù hag ar raktresoù evit kemmañ patrom : evit gorrekaat kemm an hin, evit ar frankiz da vont ha da zont, evit difenn lazioù al labourerien hag al labourerezed, ouzh mestronioù a reizh, evit liesegezh ar sevenadurioù hag ar yezhoù, a-enep ar brezel hag evit ar peoc'h.

Setu perak e fell deomp war un dro nac'hañ ar G7 ha kadarnaat hor stourmoù evit kemmañ ar gevredigezh.

En em sevel a raimp evit difenn patromoù disheñvel ha sevel lod, toullañ hentoù war-zu ur bed ma vo merket groñs ha sevenet gwir ar justis kevridik, ar c'hengred hag an ingalded. Ur bed a zo e go dija er stourmadoù e pevar c'horn ar blanedenn evit :

- ober ur torr gant ar poell kevalaour diazezet war ar c'horvoerezh ;
- echuiñ gant an dadveliezh ha rannadur al labour diouzh ar reizh ;
- stourm mennet ouzh direizhadur an hin hag evit kaout doareoù bevañ a zouj an ekosistemoù hag a warez anezho ;
- ur bed diazezet war ar c'hengred etre ar pobloù, an enepimpalaerouriezh hag an etrebroadelouriezh ; darempredoù etrebroadel divilourekaet ;
- ar galloud da zivizout ez-demokratel holl aozadur ar genvuhez hag ar gwir d'an emdermenadur evit an holl bobloù ;
- difenn an disheñvelder a sevenadurioù hag a yezhoù
- an ingalded wirion etre ar pobloù dindan beli ar ouennelouriezh ; ar memes gwirioù evit holl annezidi hag annezadeded ar blanedenn.

Pediñ a reomp an holl aozadurioù a sav a-du gant ar galv-mañ da emezelañ er gensavenn. Gervel a reomp an holl dud ac'hann pe a lec'h all a sav a-du gant ar sell-mañ d'en em sevel evit bodañ ar muiañ ar gwellañ a c'halloudoù a-benn dalc'h ar G7 e Biarritz e miz Eost 2019.

G7 EZ!

Kensavenn Bro-Euskal
nann d'ar G7 ha d'e ved